



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa
07 Jullu 2020

Observasaun JSMP ba Progresu no dezafiu implementasaun Lei Kontra Violénsia Doméstika (LKVD) durante tinan 10

Iha 07 Jullu 2020, Lei Kontra Violénsia Doméstika kompleta tinan 10 ba implementasaun no durante tinan 10 nia laran ne'e iha progresu no ninia dezafiu balun.

Prezensa lei ne'e hatudu progresu significativu iha aspeitu konsensializasaun públiku kona-ba violénsia doméstika hanesan krime públiku. Ida ne'e pozitivamente aumenta fetu sira nia desizaun atu lori sira ninia kazu atu prosesa tuir sistema justisa formal. JSMP rejista iha tribunál distritál hotu katak kada loron sempre iha julgamentu kazu violénsia doméstika. Realidade ida ne'ebé antes iha LKVD dala ruma só iha kazu ida ka rua de'it mak julga iha semana ida nia laran.

“atu asegura katak lei ne'e iha kbiit atu proteze no prevene violénsia doméstika, JSMP husu ba entidade relevantes sira atu bele halo tuir ida-idak ninia obrigasaun tuir provizaun sira ne'ebé mak define ona iha Lei Kontra Violénsia Doméstika,” dehan Ana Paula Marçal, Diretóra Ezekutiva JSMP.

JSMP mós observa progresu sira relasiona número kazu violénsia doméstika sira ne'ebé lori ba tribunál. Bazeia ba monitorizasaun JSMP nian iha tribunál distritál hotu hatudu katak kazu violénsia doméstika barak mak ninia prosesu ba to'o iha tribunál.

Aleinde progresu JSMP mós nota buat balun bazeia ba observasaun JSMP nian durante tinan 10 implementasaun LKVD, iha obstaklu barak mak mosu ezemplu hanesan: diferensias interpretasaun ba iha akuzasaun liliu ba krime maus tratus ba kónjuje no maus tratus ba menór, aplikasaun ba pena ne'ebé la proporsionál (la hanesan) ba krime sira ho gravidade no sirkunstánsia hanesan no aplikasaun pena ne'ebé la apropiadu justu tuir krime idak-idak nia gravidade no sirkunstánsia sira.

Ho razaun sira ne'e JSMP haree katak nesesariu duni atu dezemvolve matadalan legal ba akuzasaun no sentensa, nune'e prokuradór no juis sira iha uniformizasaun ba iha

intrepretasaun, promove akuzasaun, alegasaun no aplikasaun sentensa/desizaun tuir krime idak-idak nia gravidade, sirkunstánsia no risku potensial sira.

JSMP fiar katak matadalan legal ne'e, bele ajuda prokuradór no juis sira atu promove akuzasaun no desizaun ida kualidade no justu ba ema hotu no bele prevene krime violénsia doméstika sira akontese tan iha futuru.

JSMP kontinua defende katak sentensa ne'ebé konklui deit ho pena suspensaun sein regra ba konduta ka dever adisional sei la produz efeitu prevensaun tanba kondenadu no vítima sira-nia koñesimentu iha prosesu formal ne'ebé sei limitadu relasiona sentensa ne'e rasik. JSMP mós hanoin katak pena multa la'os opsaun sentensa ne'ebé aproriadu ba kazu sira violénsia doméstika. Tanba pena multa sei hatodan liu tan ekonomia família no JSMP rekomenda ba tribunál atu fo prioridade kompenzasaun sivil ba vítima sira iha kazu violénsia doméstika.

Mezmu nune'e, JSMP mós observa katak iha kazu ameasa no danu komete iha relasaun familia, maibé tribunál la konsidera hanesan krime ho natureza violénsia doméstika. Kestaun ne'e mosu tanba iha artigu 35 Lei Kontra Violénsia Doméstika la inklui krime amesa no danu hanesan krime públiku.

JSMP rekomenda atu hadia artigu 35 Lei Kontra Violénsia Doméstika hodi inklui artigu sira hanesan krime ameasa no danu nu'udar forma husi violénsia doméstika kuandu aktu ne'e komete iha âmbito no relasaun familia.

Aleinde ne'e iha tinan 2013, JSMP lansa ona nia relatóriu ida kona-ba tinan tolu iha implementasaun Lei Kontra Violénsia doméstika ho nia obstaklu sira, iha relatoriu refere JSMP apresenta nia deskobrimentu sira relativamente kona-ba matadalan legál ba akuzasaun no aplikasaun sentensa ba ba krime sira iha natureza violénsia doméstika no rekomenda atu dezenvolve no hadia.

Atu hetan informasaun kompletu, favór kontaktu:

Ana Paula Marçal

Diretóra Ezekutiva JSMP

Email: ana@jsmp.tl

Telefóne: 3323883 | 77040735

Website: <http://jsmp.tl>